

四庫全書

集部

欽定四庫全書

集部

蘆川歸來集卷二

詳校官庶子臣朱紱

主事臣呂雲棟覆勘

謄錄監生臣陳遂

謄錄監生臣曾照

欽定四庫全書

集部四

提要

蘆川歸來集十卷

別集類三 宋

臣等謹案蘆川歸來集十卷宋張元幹撰

元幹字仲宗自號真隱山人又曰蘆川老隱

周必大跋其送胡銓詞稱長樂張元幹睢陽

王浚明跋其幽嵩尊祖錄則稱永福張仲宗

皆宋人之詞莫詳孰是也王明清揮塵錄紀

其以作詞送胡銓得罪除名考卷末其孫欽  
臣跋語稱得賀新郎詞二首真跡于銓之子  
其說當信然銓貶於紹興戊午而集中上張  
丞相詩稱罪放丙午末歸來辛亥初又自跋  
祭祖母劉氏文後稱宣和元年八月獲緣職  
事道過墓下則徽宗時已仕宦欽宗時已貶  
謫但不知嘗為何官耳元幹及識蘇軾見所  
作蘇黃門帖跋又從陳瓘游頗久見所作了

堂文集序其結詩社同唱和者則洪芻洪琰  
蘇堅蘇庠潘淳呂本中汪藻向子諲見所作  
蘇養直詩帖跋而江端友王銍諸人皆有贈  
答之作劉安世游酢楊時李綱朱松諸人皆  
為題幽品尊祖錄故其學尊元祐而詆熙寧  
詩文亦皆有淵源其集今有鈔本稱嘉定已  
卯其孫欽臣所鈔然跋稱誦上陳侍郎詩序  
知掛冠之年甫四十一鈔本無此篇又曾季

狸艇齋詩話載元幹題瀟湘圖詩鈔本亦無  
此篇考胡仔苕溪漁隱叢話稱嘗錄元幹之  
詩一卷而元幹不自憶則當時已不自收拾  
疑欽臣所錄本有佚失然鈔本但五言律詩  
一卷七言律詩一卷而無古體及絕句知非  
完書又跋米元暉瀑布軸跋蘇養直絕句後  
跋江天暮雨圖跋江貫道古松絕句反收之  
題跋類中亦似後人所竄亂非其原本及考

永樂大典所載則所佚諸篇釐然具在今哀  
集成帙與鈔本互相勘校刪其重複補其殘  
缺定為十卷元幹詩格頗適雜文題跋諸篇  
具有蘇黃遺意蓋耳目漸染之故也鈔本末  
有遵祖錄一卷乃記其為祖母外家置祭田  
事附以同時諸人題跋中多元祐名臣之筆  
亦仍其舊第併附錄焉乾隆四十六年九月

恭校上

總纂官

臣紀昀臣陸錫熊臣孫士毅

總校官

臣陸費墀



蘆川歸來集原序

士君子處世不以富貴貧賤累其心者其所養可知也  
所養既厚則所言者必勁正清峭而無輕懦衰憊之氣  
前哲之士以文詞鳴者此也孟子曰我知言我善養吾  
浩然之氣孟子之知言自其所養者充之也韓子曰氣  
水也言浮物也水大而物之浮者大小畢浮韓子所學  
獨以孟子之傳得其宗者蓋謂是也故直而不倨曲而  
不屈孟子之書可與風雅並傳而汗瀾卓焯翕沍澄深

李氏之以大振頽風序韓文後之作者蔑以加于此矣  
蘆川老隱之為文也蓋得江西師友之傳其氣之所養  
實與孟韓同一本也自其為太學生也嘗裒其亡友唐  
慤生詩帖軸而藏之則公之氣槩固已蜚揚於學校中  
矣及其仕於朝也又以幽巖尊祖一節直述其忠厚惓  
惓之誠公之孝友性成皆是氣之所形見也宣和諸公  
或言其近作殊有老成之風無復少年書生之氣或言  
其平昔絕俗之文今又見高世之行是猶未覩其全集

也公以強仕之年遂掛冠之請茲蓋不以富貴貧賤累其心者所養者大所言者真表裏相符聲實相應夫豈嘲風咏月者所可同日語宜乎近世名公勉其孫以文集行於世欲以見公之節也即公之文驗公之行其作也古其傳也宜噩里人也敬慕三張之聲價久矣館寓家塾復得斂衽以受教於公之文集凡裒集書啓古詩律詩贊序等作共十五卷幽巖尊祖錄一卷附于其後樂府二卷見于別集於是乎有考焉公諱元幹字仲宗

任將作少監年方四十一已致仕後贈正議大夫邑人  
曾噩序

少監張公早歲問道於了齋先生學詩於東湖居士凡  
所遊從皆名公勝流年未強仕掛神武冠徜徉泉石浮  
湛詩酒又喜作長短句其憂國愛君之心憤世嫉邪之  
氣間寓於歌詠紹興議和今端明胡公銓上書請劍欲  
斬議者得罪權臣竄謫嶺海平生親黨避嫌畏禍唯恐  
去之不速公作長短句送之微而顯哀而不傷深得三

百篇諷刺之義非若後世靡麗之詞狎邪之語適足勸  
淫不可以訓公博覽羣書尤好韓集杜詩手之不釋故  
文詞雅健氣格豪邁有唐人風公之子靖哀公長短句  
篇屬余為序某晚出恨不及見前輩然誦公詩文久矣  
竊喜載名于右因請以送別之詞冠諸篇首庶幾後之  
人嘗鼎一臠知公此詞不為無補於世又豈與柳晏輩  
爭衡哉公諱元幹字仲宗自號蘆川居士云蔡戡序  
叔祖蘆川老人張公仲宗諱元幹以文章學問馳譽宣

政間官將作大匠志尚林壑方少壯時挂冠謝事靖康之元上却敵書見了翁談世事於廬山之上了翁曰猶有李伯紀在子擇而交之公敬受教從之游激昂奮發作為歌詞有人間鼻息鳴鼉鼓遺恨琵琶舊語之句此志耿耿殊非苟竊祿養阿附時好者之比逮紹興末忤時相意語及譏刺者悉搜去掇拾其餘得二百餘首先叔提舉餒木於家廣追念先志之不可不述因得私識其畧尚有文集數百篇姑俟作者併為之序云紹熙甲

寅姪孫朝議大夫端溪張廣謹序





欽定四庫全書

蘆川歸來集卷一

宋 張元幹 撰

四言詩

紫巖九章章八句上壽張丞相

紫巖大丞相張公生朝善頌也公帥閩之二  
年歲在作噩秋九月中澣有客作是詩以獻  
焉

赫赫紫巖白虹貫淵玉生其中匪雕匪鐫登于廊廟圭

璋渾全溫如之質所寶象賢

紫巖赫赫衆山維則秉國之鈞百僚是式志殄仇方力  
復明辟時方中興勲冠今昔

紫巖高兮上摩穹窿雨露潤澤風雲會同表宋宗臣禮  
泰智崇皇以昭之簡在帝衷

紫巖廣兮作鎮坤位盡臣之道厚德以載開國南陽厥  
緒光大是似是續福祿未艾

瞻彼紫巖降神所儲進退有度威儀甚都粵自己未帥

於無諸以忠以孝奉承安輿

北堂之尊命婦稱首逢是穀旦酌以大斗公如老萊衣  
袞裳繡式歌且舞以介眉壽

土宇未復繫公闢之士風未變繫公革之軍律未振繫  
公鼓之國論未定繫公斷之

來朝伊何築隄于沙對敷伊何言宣其麻明明天子坐  
于正衙侯公來歸相我邦家

紫巖之松在澗之沚下有茯苓兔絲蔓只結為琥珀深

根固柢願公難老受茲燕喜

五言古詩

雒陽陳去非自符寶郎謫陳留酒官予時作丞

澶淵舊僚友也有詩次韻

寒水遶近郭棲鴉蔽高原映帶幽人居暝色起草根衡  
門東南開濁河日夜奔所喜古堤月初出煙江村不入  
城市久懶訪亡與存羨子了萬事坐以一氣春

丁未歲春過西湖寶藏寺作

湖垠取微徑窈窕松門深中有古佛屋間無人足音春  
雲帶飛雨冷色來蒼岑孰知戎馬盛但見藤蘿陰平生  
雲卧想正欲幽夢尋不減避世士契此太古心

乙卯秋奉送王周士龍閣自貶所歸鼎州太夫  
人侍下

語離三秋風念子萬里客我獨憂患餘幾為死生隔相  
逢忽眼明照影俱頭白蘭若清夜長連牀話疇昔如何  
功名心一旦乃冰釋賣藥真佯狂穿雲忘遷謫不然蔬

筍腸寧無瘴烟色良由火棗成內景充尺宅下視陋九州  
槐安等稱國絕憐蠻觸爭亦復弄兵革亂來更多事  
老去覺世窄歸歟桃花源斑衣作兒劇此樂人所稀今  
我那能得他時南山南寄書北山北

奉和希道新句兼簡祖穎漕使

秋來乏隣酤近事采塗說愁多費陶寫戶小輒敗闕誰  
能空隱憂判飲最良策兩公俱世豪風味奪佳節手釀  
甕中春香浮玉丹色相餉走鷗夷芳辛真妙絕共賦醉

鄉詩銷磨閑日月頗聞鎖娉婷迴風舞流雪何妨出房  
櫳滿引快關膈此念想當然清尊可虛設我老留甌閩  
感時夢淮浙公其招故人亦記未歸客

送舒希古

老舒古君子送客皆善類觴行頗軒渠一斗輒徑醉涼  
颼生白蘋落日照紫翠驪駒雖在門不下兒女淚儻復

逢湘纍更與問憔悴

謂胡邦衡

過白彪訪沈次律有感十六韻

天驕毒中原國勢苦日削一為虛聲搖顛沛幾失腳翠  
華棲海隅此戲亦太虐忽聞哀痛詔迸淚向寥寞何當  
速悔旤四海安耕鑿迺者浙西帥望風先即却坐令臨  
安城開關猶白著只今鋒鏑餘冤鬼號冥漠賞罰二大  
柄倒持示微弱豈無英雄人戴宋心未薄有如沈使君  
忠義等籌略始終誓復仇志願久已確浮家來水村避  
亂畏增繳行矣收功名遠過麒麟閣氣投平生歡事付  
今夕喙吾哀世無用鼓勇徒矍鑠



七月三日雨不止後一日作

暝色復已夕雨聲全未疎掩關頗嗜卧篝燈空照書點  
滴聞瓦溝決溜鳴堦渠試作華屋想未減嚴城居大江  
洶波浪曠野風號呼那知三家村有此一腐儒是身在  
宇宙何適非遽廬陵谷儻遷變樓觀皆空虛安心無秘  
法絕念忘畏途生死尚可處此境固有餘

題王巖起樂齋

宦遊適樂土宴坐名樂齋問君何獨樂胷中高崔嵬軒

金史卷一百一十五  
卷一  
裳儻來物世途吁可哀紛然雞鷺爭陷穽成禍胎不如  
尋蠹魚簡編閱興衰萬事付杯酒百年俱劫灰搢頤忽  
長嘯妙想從天回人生行樂耳勿為華髮催

陪李仲輔昆仲宿惠山寺

蒼山蓄翠中殿古起野色仰空象緯高撫事戎馬隔三  
子俱人豪語默有典則安知今夕游值此老賓客危言  
驚鬼神懷舊痛京國寄書白帝城問道屈原宅三春聞  
竹枝萬里共悽惻風來松柏悲月落世界黑相看炯不

寐袖手了無策去去更酌泉吾生易南北

和韻奉酬王原父集福山之什

平生契所崇晚得故人語驚呼追曩游世道今如許中原鞠茂草萬里盡豺虎天王巡江濱對壘眺淮楚未聞誅叛亡快憤斷腰膂上復九廟讐下寬四民苦胃中有成奏無路不容吐天高雲霧深灑泣逃罪罟竭來陪勝集人物良可數高氏父子賢王甥兄弟窶相過茶酒間窮年簡編處喪亂共傷時興衰更懷古假日聊銷憂信

美非吾土夜闌然薪歸被酒踏寒雨買山結茅茨我老  
竟何所要當喬松根白石仍同煮

奉送真歇禪師往往阿育山兼簡黃檗雲峰諸

老

時流罕識真特立取衆忌不有明眼人誰止萬口沸古  
今冠蓋場毀譽固一致胡為空門中生滅亦滋熾更憐  
晚學徒遍叅反諛媚妄將宗派分未必盡師志要是鷹  
犬姿迺出蛇鼠計堂堂真歇師的的示大意所向古道

場衲子悉傾至往年入吳聞宴坐走檀施繼踵幾尊宿  
建立各超詣南方祖令行山川久增氣乃知羣魔怖不  
樂佛住世休歇雲卧菴謗焰息氛翳歛然天門開黃紙  
書廣利萬態復現前頗似厭權勢去來初何心緣感本  
自契憫茲象衆衰願力拯深樊維師法梁棟世道貴相  
濟露風吹海雲瘴嶺發巖桂欲挽衣袂留意已萬里外  
我老卜後期夜話炯不寐

送言上人往見徑山老十四韻

忽辭鼓山行便作徑山去道人孤飛雲腰包咄嗟具兩  
邊兄弟間楊岐一條路禪許衆人叅院要大家住無是  
亦無非何喜復何怒同粥鼓齋鐘等燈籠露柱佛眼接  
竹菴雲門透圓悟爾則有師承心共成佛祖可笑世上  
兒妄念分毀譽石火電光中畢竟什麼處所得能幾多  
造業不知數生死到頭來請問末後句窮漢未必窮富  
漢豈真富入門相見時此話莫錯舉

建炎感事

乾坤忽震蕩土宇遂分裂殺氣西北來遺毒成僭竊議  
和其禍胎割地亦覆轍儻從种將軍用武寨再刼不放  
匹馬回安得兩宮說巍巍開國初真宰創鴻業一統包  
八荒受降臨觀闕并州稍稽命駢頭亟膏鉞于今何勢  
殊天王狩明越諸鎮本藩翰楚破闔城血翠輿欲東巡  
蹈海計愈切詔下散百司恩許保妻妾瞻彼廉陞尊孰  
與壯班列肉食知謀身未省肯死節檢校輿地圖寧復  
見施設三吳素輕浮傷弓更心折四顧皆驚波蒼黃共

嗚咽維茲艱危秋貧士轉疎拙明年穀增貴賢愚罔分  
別何處置我家患在建午月故山盍早歸豈憂踐霜雪  
作意海邊來初非事干謁責我賣屋金流言尚為孽汪  
公德甚大游說情激烈力救歸裝貧一洗肝肺熱如公  
趨急難正似古豪俠行藏道甚明親養志先決去矣茅  
三間無問衣百結他時期卜鄰此日尤惜別請以兄事  
公尺書未宜綴

奉同黃檗慧公秀峰昌公丁巳上元日訪鼓山



珪公游臨滄亭為賦十四韻

孤雲乘天風飛入海上山松聲發鼓吹導我登層巒平  
生烟霞想政在巖壑間及茲百事懶作意三日閒聊將  
燒燈夜付與兒輩看來陪老禪伯杖履同躋攀曲折幾  
蘇磴竹引春爛斑竇口咽細泉崖腹鳴飛瀾足疲眼界  
遠語樂心地安倒景射西崦晃蕩雲海寬十年戎馬後  
集此蘭若難未必支許游能盡賓主歡暝色到峰頂月  
光散林端摩挲忘歸石告以幽追觀

九月一日與王季夷酌別為賦十六韻

黃鵠搏秋風一舉輒萬里飛鳴蓬蒿間燕雀徒為爾王  
郎志凌雲英妙良可喜片言隻字奇採掇殊未已樂從  
長者遊論事亦疊疊知我中原時早與大門齒流落天  
南端相過不相鄙迺翁四男兒君蓋處其季家世賢弟  
兄自立要如是古學儻有成終身保無愧陋哉丰簞人  
惟見目前利茲焉入三吳索詩餞行李何補僕馬饑聊  
復慰深意可同洪喬書盡付淞江水今夕燈燭涼便當

茱菊醉畏途重語離餅卧莫遽起

訪周元舉菁山隱居

胃次飽丘壑迺覺軒裳輕舉世沈湎時勇退公早醒十  
年烟雨簑手種松杉成蒼根鬱寒霧老色入戶庭棲心  
不爭地似欲畢此生那知戎馬際亦使山房驚四海方  
蕩滴積骸盈破城公豈失策者獨留枯槁形賊舟會稍  
遠請復安柴荆暗泉雜夜雨稚筍肥晨烹起予歸去來  
故山今可行胡為困羈旅浩歎常吞聲

七言古詩

次仲彌性所和陳丈大卿韻

伏波晚歲思少游萬事過眼如雲浮我生不樂城市隘  
受性但愜林泉幽稍同臭味自投合肯與流俗相對酬  
旅懷久已乏佳趣白日政覺多閒愁春容大篇忽旁及  
氣象楚澤涵新秋律嚴雖許強續尾韻險豈復能畫籌  
逍遙一舸白太傅蹴踏五字韋蘇州主人頻誇小鬟舞  
勸客且聽吳娃謳從來誰數折巾郭重到似是我桃劉

夢入江湖渺春水何如此念隨輕鷗

林宗自況也

### 東平劉左車坎止春歌

先朝相國今幾家我嗟夫子鬢已華  
瓊艘頗慣倒膏乳老來手釀尊仍窪  
百年彈指法界觀萬事過眼天女花  
聊學兒曹作春甕喚客取醉無等差  
夜眠不覺體平粟卯頰共眩朝蒸霞  
養生妙處本無說我輩豈解燒丹砂  
糟牀正可珠的皪石鼎莫放聲咿啞  
東風遮幕雪埋屋坎止齋中酒初熟

送高集中赴漳浦宰

三年烏石僧房居忍飢待次真臞儒有意載酒問奇字  
無事閉門抄異書一行作吏去漳水斂版趨廊參刺史  
胷中豪氣半銷磨稍覺風波生眼底高郎高郎君莫嗔  
舉世未有如君貧毀官不復謁時宰老大甘為行路人  
君今業已臨民社辦取催科時下下不然彭澤歸去來  
簿領皆榜何為哉男兒策勲有時節家世況自圖雲臺  
信中居仁叔正皆有詩訪梅于城西而獨未暇

載酒分付老拙其敢不承

關山往歲曾冰裂  
跋馬平坡千樹雪  
疎枝冷葉最撩人  
雪後生香微帶月  
醉中不數長短亭  
狐裘擁鼻風前醒  
十年喪亂豈記憶  
一見新詩心目驚  
平生公輩真豪友  
意氣相投共杯酒  
祇今流落天南端  
悵望中原莫回首  
及身强健頻看梅  
此花到眼春光催  
玉人風味正清絕  
但欠雪月相裴回  
欲訪城西尋醉語  
竹籬茅舍知何許  
攜壺藉草儻不嗔  
便與此花長作主

希道使君見遺古風謹次嚴韻

君侯氣挾飛仙骨，挿腦伏犀高。崑崙榮枯過眼海，一漚  
出處何心兔。三窟養生得趣，喜按摩子夜不眠頻叱咄。  
枕中玉函妙以微，肘後金精恍兮惚。我真蒲柳欲師承，  
刻畫無鹽恐唐突。似聞有意贈刀圭，倒卷逆流翻澌渤。  
世間萬態古今同，政可忘言佯吃訥。杖藜未辦飲菊潭，  
且看冥鴻秋滅沒。

葉少蘊生朝



先生早貴當天升文章爾雅傳六經腹包萬卷書縱橫  
玉堂草制羣公驚繡鞵綠髮趨承明意氣已向沙堤行  
出入四紀更寵榮聲華摩空鬱崢嶸坐嘯十郡慙九卿  
視公進退為重輕聖神天子開延英丞轄政地思儀型  
中開香火祠殊庭石林高卧憂蒼生五載筦鑰司陪京  
貌貅百萬環屯營大江千里依長城控制勅敵堅其盟  
詔書移鎮來旆旌山川草木知威名潢池桴鼓令不鳴  
盡歸戲下息鬪爭維師鷹揚宇宙清指顧號令驅風霆

小試擒縱孰敢撓部曲愛戴如父兄太阿龍泉發新硎  
逆順之勢如建瓴綸巾羽扇寬作程韜略堂堂時俗評  
乞師未用牛酒迎胷次自有堂上兵姦宄革面輸忠誠  
碧海不復鯉鯢腥細數前輩存典刑爛爛伴月唯長庚  
歲時建巳嶽降靈三奇天運乙丙丁良辰樂事非難并  
香凝燕寢合鼓笙舞翻流雪歌嘯鶯兒孫遶膝奉兕觥  
安輿綵服壽且寧五福共應南極星龐眉鶴骨超錢鏐  
清都絳闕吞蓬瀛明年正拜居阿衡鑪錘造化推至誠

黼藻王度重丹青雲龍會遇真千齡義和日馭無虧盈  
永佐火德輝炎精

賦漳南李幾仲安齋詩

羔豚蒸乳活鬻牛口腹造業誇息羞儻知晚食足當肉  
一飽何苦多營求先生睡美黑甜處那聞鐘鼓朝鳴樓  
布衾竹枕自穩暖此念灰冷百不憂世間寢食乃日用  
衆生擾擾如蚍蜉昔年我亦走南北往反萬里無停輟  
胷中不作異鄉縣有似坐閱十數州雲山渾如舊過眼

歲月不覺春已秋宿君齋屋亦偶爾更僕笑語久未休  
夜闌各困且打睡明日飢飽臨時謀

次韻奉酬楞伽室老人歌寄懷雲門佛日兼簡

乾元老珪公并叙鍾山二十年事可謂趁韻也  
雲門道價傾緇白一去如何絕書尺乾竺宗旨超隱峰  
客至不鳴齋後鐘楊岐兒孫真鐵脊二子等是僧中龍  
平生我如折韉線老來要認本來面憶昨二老初相知  
竹爐擁衲清夜圍佛眼霜顱象懶瓚園悟辨口吞韓非

鍾山往事無人識我識二子因師得楞伽一句作麼生  
請問同參俱本色

贈慶紹上人

上人久住湖外遊辛亥春陷孔彥舟長沙城中就驅掠  
七十七日遭拘留眼看殺人等螻蟻劒血洗盡湘川流  
張帆方離道林岸鼓枻已過巴陵樓兵纏妖氣草木暗  
火熾亮焰雲烟愁衣冠子女半同載俛首悲泣猶驚羞  
蒙衝頗諳大風浪舴艋或掛長戈矛兩舷矢集鬧如雨

勢欲歌側爭先投相牽浮湛狀菱荇乍墜出沒真鳬鷗  
衆生流浪幾生死愛河苦海何時休曹成馬友互屠滅  
偶爾不殺老比丘枯顱茁髮蟻蛭滿得脫性命非人謀  
孰知賊黨亦方便日供齋鉢仍茶甌南歸數年閉戶卧  
故山精舍松颺颺灰心一切本夢幻返照逆照無人牛  
細聽此語重歎息羣盜掃迹夫何憂吾閩目前豈不樂  
禾稻未穫先麥秋師來訪我問居士我若訪師尋淨頭

西峽行

西峽門東晚潮上  
濤頭駕風高  
數丈絕江艇子更揚帆  
風水相吞兩岸壯  
中流蕩潏思慮深  
欲濟未竟愁夕陰  
賈客胡商數航海  
忍死射利誠何心  
不如遵陸困輿阜  
九折羊腸復相惱  
下臨湍瀨千仞淵  
昏靡輕生履危道  
我曹過計常私憂  
垂堂之戒寧自尤  
經營一飽亦細事  
世亂畏塗歸罷休  
少年新進真兒劇  
浪喜功名不量力  
殺身無補誤朝廷  
天下英雄古難得

奉送李叔易博士被召赴行在所

君嘗手校輿地圖上下千載鉉黃朱斯人魁磊豈假此  
願見尅復東西都胷中遠略指諸掌表裏拄腹撐腸書  
深知禍起取幽薊頗覺氣王吞青徐眼看僭偽忽亡滅  
逆黨未足勞誅鋤萬方助順事可卜火運要是穹蒼扶  
興衰撥亂戴真主會掃氛祲開雲衢于今荆淮付諸將  
控帶川陝襟江湖儻能倒用進築法更許世襲宏規模  
兩河境土不難辦狡寇膽落遊魂孤古今徒聞作戎首  
中國禮義終如初公家自有中興相雅意泰階光六符



難兄難弟實間出直欲竝駕仍齊驅承明入謁一見決  
三遷故事登元樞整頓乾坤賴公等我病只合山林居  
殘年正爾甚易與不過二頃鄰一區平生故人半廊廟  
老僧何患無門徒與君痛飲遽成別努力強飯供時須  
男兒富貴亦細事否泰相反分賢愚酒酣起舞莫作惡  
行矣自愛千金軀本朝再造舊基業速拯塗炭疲氓蘇  
勿令毫髮有遺恨文章爾雅華國猶其餘

拜顏魯公像

吳興祠堂祀百世凜凜英姿有生意坐令異代乾沒兒  
莫敢徜徉來仰視唐家綱紀日陵遲僭竊相連益昌熾  
我公人物第一流皇天后土明忠義屹然砥柱立頽波  
未覺羊腸隕坦履欲回希烈叛逆心老夫但知朝覲禮  
年垂八十位太師平生所欠惟死耳死重泰山古所難  
杞鬼竊柄猶偷安安知我公本不死汝曹有知當骨寒  
豐碑法書屋漏雨政與丹青照千古天遣神物常守護  
要使亂臣賊子懼

祥符陵老許作先馳歸閩因成伽陀贈別紹興  
甲戌秋七月書於鶴林山

無量劫來幾相見莫話南州與北縣居士向來業風吹  
自合失却本來面今年坐夏在鶴林許我先馳海舟便  
三山到日已秋深且看山門騎佛殿



欽定四庫全書

蘆川歸來集卷二

宋 張元幹 撰

五言律詩

次韻唐彥猷所題顧野王祠與霍子孟廟對

蘭若黃門像相望  
博陸居衣冠  
塵亦暗  
簫鼓祭全疎  
草色侵荒逕  
潮聲過夕墟  
遺風猶可想  
弔古一觴餘

過宿趙次張郊居二首

北客多流落  
東村更寂寥  
肯同清夜夢  
不待故人招  
月

挂荒園竹霜飛獨木橋聽雞休起舞且共論天驕  
莫歎交遊晚相期歲月深秋來初識面老去要知心燈  
火須更僕杯盤取自斟平生王霸術袖手有微吟

次韻奉和平叔亭林至日之什

雲物果何好客愁今更新坐來江月白興在雪籬春我  
輩且同酌公詩殊出塵莫思淮海上黑幟雜黃巾

花飛

雨暗連兵氣花飛點客愁寓居皆野寺相過只扁舟不

作新塘去還為後柳游盤殮雖杞菊得飽勝椎牛

送江子我歸嚴陵

久客驚秋晚懷歸更送君  
亂來俱避地老去惜離羣  
山閣盃浮菊江城鴈度雲  
行行經釣瀨時事不須聞

亂後

亂後今誰在年來事可傷  
雲深懷故里春老尚他鄉  
寧復論秦過終當作楚狂  
維舟短籬下聊學捕魚郎

返正

諸將爭傳檄羣凶尚阻兵天旋黃屋正日轉赤墀明喪  
亂多妖孽經綸貴老成鯨鯢終必戮草木已知生

冬夜有懷柯田山人四首

聞說新居好山樊卜築深藥囊能濟物龜策少知音四  
海憂黔首中原盡綠林直須期雪屋夜倬去相尋

坐閱干戈擾輸公已定居生涯今易足世態莫嗔渠晷  
短全疎客窓晴好對書故山常入夢何日到吾廬

客裏了無況亂來何止貧淹留頻換歲老大更思親泥



飲思田父供糧乏故人自憐歸未得不是白頭新  
雅欲賦招隱何堪弔戰場獨看星錯落久立夜蒼茫羽  
檄來東越風煙隔下塘安閒隨處有冠蓋莫相望

登垂虹亭二首

一別三吳地重來二十年瘡痍兵火後花石稻梁先山  
暗松江雨波吞震澤天扁舟莫浪發蛟鱔正垂涎  
熠熠流螢火垂垂倒飲虹行雲吞皎月飛電掃長空壯  
觀江邊雨醒人水上風須臾風雨過萬事笑談中

送趙公遠往建康

王孫朝謁去功業歟流年強項今三已棲遲未九遷笑  
談曾擊賊謀畧合臨邊秋雨長干路歸時且著鞭

偶成寄友人

萬里天南客三年日至歸羣陰雖久否吾道豈終微顧  
我民稱逸如君遜正肥鯨魚波浪穩雲翼有時飛

感事四首丙午冬淮上作

國步何多難天驕據孟津焦勞唯聖主游說盡姦臣再

造今誰力重圍忌太頻風吹遷客淚為灑屬車塵

血灑三城渡心寒兩路兵洛師聞已破陵邑得無驚憤  
切吞妖孽悲涼托聖明本朝仁澤厚會復見承平

戎馬環京洛朝廷尚議和傷心聞徇地痛恨競投戈始  
望全三鎮誰謀弃兩河羣凶未殄醢吾合老江波

肉食貪謀已幾成國與人珠璣輕遺賊玉冊忍稱臣四  
海皆流涕三軍盡奮身不堪宗社辱一戰靖邊塵

丙午春京城圍解口號

戎馬來何速春壕綠自深要知龍鳳聚不受虎狼侵九  
廟安全日三軍死守心儻為襄漢幸按堵見於今

漫興

老蒼書題嬾貧營口腹忙未能忘壯志詎肯變剛腸晷  
短催寒急燈明伴漏長牀頭褚衾在不怕滿簷霜

奉送富修仲赴南昌尉

吏道雖餘事人情要飽諳家風端自守句法有同參南  
浦翻雲浪西山滴翠嵐折腰與趨走政恐未能堪

夜宿宗公丈室求詩甚勤為賦五字

林表登層閣秋聲隱暮鐘  
鷗歸苦竹寺雨闇亂雲峯  
屢乞留新句重來訪舊蹤  
松門罕車馬似喜老夫逢

范才元參議求酒於延平使君邀予同賦謹次  
其韻

桑落冷筇玉菊籬霜著天飄零河朔飲悵望竹林賢鳥  
有防前轍青州貴下田使君能遣騎端為喚魚船

次韻晁伯南飲董彥達官舍心遠堂

今夕知何夕真成累十觴  
爐薰飄月影蜜炬剪花香  
政嬾還詩債無從發酒狂  
故人憐久客舞袖要須長

喜錢申伯病起二首

一室維摩老長年法喜游  
苦心翻貝葉癡坐寫蠅頭  
可是文園病何堪杞國憂  
我知公健在骨相合封侯

花飛傷宿雨山潤照清晨  
念子經時卧嗟予一味貧  
稍聞疎藥餌遐想整衣巾  
何日扶藜出相陪醉晚春

叔易自三吳歸同赴竹菴荔子之集二首

惜別梅花雨來歸荔子秋江帆成昨夢雲嶠忽重游共  
喜身長健寧論客久愁慙慙老居士更為寶峯留

客去雲俱散山空月正圓不參藤樹句自透竹菴禪骨  
法凌煙像家聲鼓瑟篇直須陪叔季急佐中興年

寄錢中伯二首

子去客昭武今懷懷舊游青山渾在眼白髮暗添頭旅  
食今安好歸程儻滯留谿邊因野步試覓水明樓

一點照今古胷中殊了然不妨為漫吏可但號臞僂丹

荔盟猶在凝香句未傳秋風稍涼冷速辦下灘船

真歇老人退居東菴予過雪峯特訪之為留再宿仍賦兩詩

雲卧孤峯頂齋餘閉戶眠時容龍象衆來說葛藤禪此  
日輸真歇平生最信緣從渠魔起謗把火湯燒天  
山月轉松影澗泉鳴夜窓清談虎溪遠癡坐鹿門僮敲  
國終亡滅邊城合受降晨鐘發秋思同夢繞三江

解嘲示真歇老人二首



不作市朝夢生憎城郭居前身真衲子妄念入儒書丘  
壑無疑老軒裳久已疎世人多大屋爭笑賣吾廬

毀譽何時了雞蟲事可知不妨遭點檢好在莫相疑高  
爵非吾性奇勲任爾為道人元具眼批判亦慈悲

申伯有行色會宿東禪次元韻

真成風雨夜精舍對床眠去住非無數行藏莫問天十  
年瀕瘴海一棹破春煙君自足歸興不妨啼杜鵑

次折樞留題雪峯韻

軒冕本無意煙霞如有期故人容野老勝餞見新詩誰  
辦兼忘世公當急濟時春歸仍送別好在出山遲

次韻范才元中秋不見月

不見中秋月長吟五字城浮雲有底急清影可憐生殘  
夜四更句故人千里情與君同悵望天上自分明

次呂居仁見寄韻

老去猶為客誰人念退居相望千里路賴有數行書白  
曠猶堪寄烏牛政憶渠何時聞枉駕竹裏喚行廚

次韻劉希顏感懷二首

春光垂老日北騎欲歸時王氣如三捷懽聲定四馳山  
河還舊貫草木有餘悲擬頌中興業孤忠只自知

避謗疎毛穎推愁賴索郎坐來春漏促夢去畏途長故  
國書題冷新詩齒頰香湖山雖好在歲月已相忘

郭從範示及張安國諸公酬唱輒次嚴韻

登樓乘暇日喚客共澆愁春去花猶發陰濃雨未休和  
詩真冷澹得句總風流能遣西隣老殊無陋巷憂

上張丞相十首

閩粵諸侯地春風盡去思三年歌德政萬戶繪生祠位  
極聊方伯謀深必帝師待公安社稷四海被恩私

廣漢家山遠臨川道路旁安輿懷故壘同氣聽甘棠雪  
後風煙潤春歸草木香丹心馳魏闕夢想萬年觴

活國勲奇甚平戎志未衰肯從時論屈自許世人知豹  
尾遙臨鎮蟬冠暫祝釐天將擒頡利露布捨公誰

百六古今有兩宮開闢無興師誠刷恥奮袂競捐軀必

挾三靈助能令萬國享九宮毆六甲何患五單于

擾攘干戈際中原既太深野心殊叵測內地任頻侵日  
昃那常晦陽生自剝陰德光非不僭終識殺狐林

國士多孤憤君侯特長雄玉墀曾復辟鐵券會論功宇  
宙尊文物關山界土風力扶炎運正此意合蒼穹

袞繡春秋富旂常事業新三遷推孟母一德表商臣任  
重能知止功成合保身儻容陪几杖同訪赤松人

賤子居閭里明公總帥權姓名誰比數禮遇每周旋老

去無三窟閉中有二天知音何日報願見中興年  
罪放丙午末歸來辛亥初不談天下事猶誦古人書利  
病明諸掌危疑傲後車他時果無悔載籍定欺予

簪紱久已棄行裝今甚疲買山如畧辦畢娶更奚為小  
築開三徑躬耕趁一犁賴公霖雨手忍賦語離詩

送李文中主簿受代歸庭闈

豹隱猶遮霧鸞棲遂及瓜綠林方在境綵服徑還家世  
路久來險人情何用嗟胷中自丘壑樂處是生涯

戊辰春二月晦日同棲鸞子送所親過寶積題

壁間

春江因送客雲嶠更登臨精舍經行地征人去住心猿啼清夢斷花落曉窓陰勝踐成三宿俱來此意深

代上張丞相生朝四首

上相生坤位中興運泰開德威加異域文武屬全才南極星躔煥東方騎氣來下車逢誕日喜色照罇罍

奇勲施社稷萬世許忠嘉賓日扶神器回天坐正衙貂

蟬我上袞鞬鼓擁高牙暫屈臨閩粵重聞降白麻  
坤維標厚載任重出宗臣眉宇如虹氣儀形似玉人中  
興真有相命世必逢辰霖雨聊均逸餘波潤七閩  
將相兼文武謙光接下僚輿情爭快覩善頌適生朝勲  
業當興宋謀猷永佐堯千秋迎壽母忠孝稱金貂

李丞相綱生朝三首

炎景生賢佐三朝火王時德威雖敵畏忠蓋只天知安  
國驚何久收功曾有期他年調鼎地黃髮屬公師

又作去國



驚華髮為霖在赤墀十  
年門下士方獻此篇詩

戲亂登廊廟羣公數靖康一身輕去就百口恃安強天  
意非難見人情漫自涼慙懃酌周斗矍鑠更鷹揚

希世推英偉行藏孰是非橫流曾砥柱袖手且深衣槐  
影搖黃閣星躔煥紫微山林愚已老衮繡看公歸

輓少師相國李公

望表公師位身兼將相權三朝更出入一德奉周旋盍  
為蒼生起曾扶大厦顛何知老賓客擁篲掃新阡

往在東都日傷心丙午年不從三鎮割安得兩宮遷抗  
議行營上排姦御榻前英風成昨夢遺恨落窮邊

城守麾強弩諸班果翕然雲梯攻正急雨箭勇爭先中  
夜飛雷礮平明破火船如公真徇國繪像冠凌煙

壯志深憂國丹心篤愛君謗書興衆枉諫疏在奇勲風  
咽梁谿水山悲湛岷雲空餘雙舞鶴鼓吹不堪聞

淚盡西州路碑留峴首名買山緣荔子為圃養黃精所  
至登臨地猶疑步履聲堂堂真漢相天忍闕佳城

輓寺丞許子如

盛世黃門嗣輕裘綠髮時傷心來故里刮膜訪良醫春  
雨銘旌暗東郊薤露悲人生得意早遺恨在孤嫠

輓夢錫機宜寺簿

零落梁谿客何堪鄭子悲閉門專學易擁鼻愛哦詩臭  
味方投合行藏罕遇知他年鄉飲酒揚觶想威儀  
太府堅辭掾平陽頃著功清貧名教樂靜退昔賢風俛  
首稠人裏甘心正論中胡然成鬼錄骨相本三公

問疾方旬浹殊驚不起傳所欽期異日何意遽終天圖  
籍嗟空富生涯衆漫憐保家宜有後一角儻稱賢

輓林天和

歎息宜春守抽簪未亂歸不應徒告老要是久知幾築  
室聊遮雨耘田止療飢杜門何悔吝牖下斂朝衣

行配古君子齒尊鄉丈人儻來名位晚長往誅文新薤  
露空悲臘芻靈不見春諸郎無過毀壽考沒元身

輓李仲輔三首

畫省何心入軺車隨分行急難頻太息交友舊馳聲素  
月墮江影白雞悲夜鳴繡衣無復出部曲把銘旌

貌古期驚世心夷合享年交遊稱長者風味配先賢鴈  
序飄零地龍門寂寞邊不知誰作誄著意翠珉鐫

人生真寄爾天問竟悠哉三載重凶釁一門皆異材尚  
疑書未報遽有訃先來淚盡餘青血秋風萬壑哀

彭德器北堂太夫人輓詩

蚤歲棲居久儒家守志貧白頭躬祭祀老眼喜縫紉哭

婦無遺恨憐孫不忍嗔一朝違孝養力疾叫蒼旻

劉建州母夫人難氏輓章

慈顏推壽相懿範在吾鄉不待黃堂養空遺紫誥藏板  
輿悲騎省鶴客弔龍驤風卷銘旌去松岡闕夜長

五言排律

李丞相生朝

柱史生周室仙源譜系崇儲星昭昴宿降嶽表神嵩間  
氣憑家世宗臣挺祖風夢求終作楫獵卜果非熊感遇


雲龍會恩深雨露豐折衝淵聖日輝赫靖康功社稷歌  
傾際乾坤震蕩中力扶神器正堅守帝都雄割地爭三  
鎮回天定兩宮壯圖期救難大節恥和戎去國孤舟遠  
憂時百雉空建炎欣翊戴鴻慶襲光融相印機衡重兵  
權號令通安危繫禮貌進退肯雷同巨屏頻循撫真祠  
示眷蒙歡聲逢穀旦善頌達蒼穹弼亮需元老平章合  
上公五行推有本六甲混無窮再造邦基固中興大運  
隆保民躋壽域千載簡宸衷

張丞相生朝二十韻

鳳歷推炎德宗臣繫重輕神開丹宸夢人向紫巖生昂  
宿秋旻迴坤維玉露清風雲符感遇草木畏威名不有  
三靈助寧無四海驚大江元帝渡細柳亞夫營勁氣吞  
妖孽深謀厲甲兵天旋黃屋正日轉赤墀明茅土宜班  
數山河舊著盟濟時登衮職命世屬阿衡社稷扶持了  
乾坤整頓成勲庸多部曲陶冶遍公卿牙帳羅旌葆萱  
堂合鼓笙誕辰尊壽母善頌及難兄慶積基墉固源長



福祿并欲知  
貂珥貴倍覺  
綵衣榮象闕  
鋒車召沙堤  
相印迎指麾  
烽燧靜翊戴  
泰階平老鶴  
三千歲飛鵬  
九萬程百川  
浮巨竿快飲  
吸長鯨





欽定四庫全書

集部

蘆川歸來集卷三

四三

詳校官  
漁子<sub>臣</sub>朱紱

主事<sub>臣</sub>呂雲棟覆勘

膳錄監生<sub>臣</sub>潘原濬

膳錄貢生<sub>臣</sub>苗亨廉

欽定四庫全書

蘆川歸來集卷三

宋 張元幹 撰

七言律詩

次韻送友人過山陰郡時夜別于舟中

草草杯盤燦燭光  
故人相對水雲鄉  
濤江君去訪秦望  
丘壑我歸為楚狂  
活國未逢三折臂  
憂時空轉九回腸  
絕憐明發成南北  
夢寐全無夜太長

喜王性之見過千金村

春來書劄已西東喜復相逢亂世中萬事變更唯舌在  
三年流落轉塗窮雲收野寺侵廊水月挂孤帆送客風  
剩欲留君明日住夜闌難得一罇同

次江子我遷居韻

平生自省宜三黜老去何心望九遷避地湖山聊復爾  
脫身兵火想當然浮家泛宅非無計坎止流行本信緣  
猶恐驚濤翻四海直須化鶴作飛仙

次趙次張見遺之什韻

海邊游子日思歸  
新句勞君更置規  
莫問人間多貝錦  
正如天上有參旗  
寄書只欲憑黃耳  
去路誰能畏赤眉  
定與故巢猿鶴老  
此生無愧北山移

過雲間黃用和新圃

繚池剩欲開花徑  
傍舍先須作草堂  
雨後不妨頻檢校  
客來留得共徜徉  
故園怪我歸何晚  
避地輸君樂未央  
待得功成方卜築  
豈如強健享風光

蘭溪舟中寄蘇粹中

氣吞萬里境中事心老經年江上行三徑已荒無蟻夢  
一錢不直有鷗盟雲收遠嶂晚風熟浪打寒灘春水生  
鴻鴈北飛知我意為傳詩句濮陽城

別綬老

無端流落迫殘年三十南山訪老禪未契安心了難覓  
不如同世且隨緣頻移竹几負寒日旋拾松梢炊晚煙  
珍重孤雲出山去東西南北一青天

次江子我聞角韻

夫差故國縈寒水，鐵馬南來忽振纓。  
城上昏鴉爭接翅，舟中逐客謹逃名。  
悲笳怨處風微起，濁酒醒時夢易驚。  
飄泊似聞山寺近，真成夜半聽鐘聲。

次韻奉呈公澤處士

屏迹苕溪少往還，時危尤覺故人歡。  
相期臘盡屠蘓酒，速享春來苜蓿盤。  
雪夜劇談烽火急，風江絕歎鐵衣寒。  
何年塞上烟氛靜，薄海蒼生慶乂安。

次友人寒食書懷韻二首



往昔昇平客大梁新煙然燭九衢香車聲馳道內家出  
春色禁溝宮柳黃陵邑祇今非漢土衣冠誰復問唐裝  
傷心寒食當時事夢想流鶯下苑牆

孤生投老急菟裘萬里雲山已勸游共喜石交逢異縣  
更陪綵筆賦春愁無心俯仰猶多事與世浮湛已拙謀  
冷雨吹花作寒食三杯軟飽且眠休

訪親于連江因過筠溪叩門循行歎其荒翳不  
治有懷普現居士口占此章

筠莊主人何未歸溪畔長林穿翠微此去功名時欲至  
箇中車馬蹟全稀茅茨漏久蝸涎篆籬落歌多蛛網圍  
公肯借菴容我老為公朝夕掃柴扉

奉同公直圮老過應夫石友齋

王郎曾次鬱崢嶸鑿牖開軒不浪名疾世政須論石友  
絕交今已見方兄我曹自笑真同病吾道誰當為主盟  
但得此心如此老故人寧復負平生

宮使樞密富丈和篇高妙所謂壓倒元白末句

許子尤非所敢承謹用前韻叙謝

脩門一出十經春相業時來自奮身袖手深謀終活國  
揮毫佳句且驚人話言每許聞前輩賓客何堪接後塵  
待掃欃槍洗兵馬兩翁元語記天津

子立昆仲垂和遊天宮詩既工且敏義不虛辱  
再此見意

華裾綠髮等青春詩似機雲定後身家學乃翁真具眼  
祖風當代豈凡人字中仙爪便搔痒句裏靈犀解辟塵

萬壑爭流君看取西興從此是通津

端常觀察被旨入蜀迎母夫人所得贈行詩文  
成巨軸矣臨別亦辱見索匆遽中愧乏好語掇  
拾諸公餘意勉成四韻

髻鬢分携幾見春它時有恃獨常顰何期萬里漂零後  
忽報三巴信息真素髮輕安膺晚福遠懷悲喜望征人  
王孫盛事今雙美及早歸來奉紫宸

次韻文老使君宗兄見贈近體佳什兩篇僕與

公別四十餘年一旦邂逅情著于辭

使君元自錦官來百丈重尋灋瀨回化閱行年如伯玉  
心成全德過王駘把麾政爾人生貴持橐終期間世才  
莫問桃花今老矣劉郎去後任渠栽

舊游蘭若盡英才坐上高談亦壯哉老去語音雖記憶  
衆中容貌各驚猜津亭夜雨故人少樽酒燈花鄉信來  
茂苑相逢話京洛柁樓猶喜待春回

冬夜書懷呈富樞密

耳聾無用問新聞  
矯首何妨目作昏  
癡絕已甘投老境  
背馳寧受乞憐恩  
難陪年少從渠薄  
賴得春回為我溫  
京洛交游頻檢校  
渡江今有幾人存

次韻趙元功贈李季言之什

赤縣飄零未易逢  
那知今夕一樽同  
好招明月共清影  
託與白雲行太空  
懍懍舊游如隔世  
蹉跎壯志莫論功  
兩公秉燭還相對  
情話從渠半醉中

次韻元功才友道中見貺因以解嘲

當時勇決徑歸休，更有人愚似我不。  
何許置錐寧免累，直須畢娶始無憂。  
頻遭白眼傷流俗，誰向青門念故侯。  
客裏題詩相慰藉，羨君椽筆合螭頭。

奉送晁伯南歸金谿

君家諸父多人傑，半是平生親舊間。  
莫話故園空矯首，相從逆旅足開顏。  
文元勲業金甌字，昭德風流玉笋班。  
此去騰驤吐虹氣，何由來伴老夫閒。

奉簡才元探梅有作兼懷舊游

遮莫胡僧問劫灰且陪東閣賦官梅春梢慣識官粧樣  
花信偏隨驛使回痛飲我曾身總健浩歌誰怕老相催  
疎枝氣壓羣芳盡羞殺牆陰錦被堆

才元思如湧泉愈和愈好晨興遣騎扣門披衣  
疾讀走筆再酬嚴韻

陽和生發驗葭灰但見江梅欠蠟梅風味向人忘冷落  
歲寒乘月重徘徊從來對酒遭花惱何獨題詩被雨催  
公子唾珠無限思更看鐵畫寫離堆



奉酬才元席上所賦前韻

夜飲華堂燭屢灰暗香浮處數枝梅坐中一笑對三粲  
客裏此歡能幾回醉後不知歌扇去歸時還是曉鐘催  
露濃月白溪橋路但記羣山翠作堆

冬夜癡坐似聞才元作集有日矣因和前韻奉

呈

擁爐書帙易塵灰覽古臨窓獨對梅未寤徑須呼子慎  
常奴何得比方回虛名到底將安用能事從來不受催

似許相過陪客醉  
曾中那復有愁堆

遊東山二詠次李丞相韻

寒木高蘿幾曲溪  
斷碑零落臥荒祠  
澄潭想像雲頭涌  
懸瀑依稀雨脚垂  
地軸漫煩龍虎戰  
天符那得鬼神私  
茫茫造物殊難曉  
要是為霖自有時

右鱣溪

公如謝傅暫閒身  
我亦歸來效季真  
山屐數陪銷暇日  
詩篇常許和陽春  
虛懷寄傲三休外  
洗眼旁觀萬態新

谷口榴花解迎客騎鯨端為謫仙人

右榴花谷

留寄黃檗山妙湛禪師

晨發薌城越數峯我來師出失從容  
白雲遮日蔽秋寺青嶂聞猿驚暮鐘  
世亂可無閒地隱山深偏覺老僧慵  
他年芋火談空夜雪屋松窓約過冬

用折樞韻呈李丞相二首

參陪仍許瘦筇支長者登臨敢後期  
鐘斷白雲飛雨過

月生青嶂夜涼時  
心知勝地都忘睡  
喜聽連牀共和詩  
蓮社風流增荔子  
餘生長健更何為

莫問蒲萄出月支  
不緣瓜果訪安期  
輕紅滿地人慵掃  
空翠霑衣雨足時  
松蔭清泉聽落澗  
蟬嘶晚吹助裁詩  
公乎此去歸廊廟  
無用山中怨鶴為

再和李丞相遊山

海山幻出化人宮  
樓觀新崇萬指容  
雲霧入簷銀色界  
藤蘿昏雨妙高峯  
放懷久已參黃檗  
雅志無疑伴赤松

欲去更聞獅子吼忘歸橋下興猶濃

次錢申伯遊東山韻二首

東麓坡陀盡梵宮我來泉上照衰容解衣又作茶瓜客  
倚檻同看煙雨峯何用苦吟凌鮑謝要須高節配喬松  
海冰永閤錐沙畫絕歎故人遺墨濃

掃榻開軒走寺宮吾曹終日得從容夕陽初落鱗溪路  
雲氣半遮獅子峯試問丹砂回白髮何如瀑布煮枯松  
暮年縱有壯心在歸意已勝山色濃

次韻錢申伯遊東山既歸述懷之章

山人不省大明宮  
懷昔幽尋自改容  
廬阜東西二林寺  
錢塘南北兩高峰  
百年有盡雲歸壑  
萬事無邊月掛松  
滿院蒼苔重到日  
秋光欲滴向人濃

哭鄒德久二首用前韻

出守真成夢蟻宮  
天台雲色亦愁容  
時來盍錫萬釘帶  
仙去俄歸羣玉峯  
川上可驚如逝水  
歲寒徒有後凋松  
煩將老眼銀河淚  
共灑西風絮酒濃

窮達那知十二宮由來與世不相容  
迺翁極諫牽龍袞百謫同愁割劒峯  
前輩品題推玉樹平生憂患挺蒼松  
傷心身後夸君賜泉路恩光底事濃

再用前韻哭德久

女無美惡妬深宮盛德如公果不容  
何遽蓋棺臨禹穴未應藏骨在秦峯  
論文平日樽中酒挂劒它年冢上松  
點檢交親祇解少存亡悲感老情濃

再用前韻重哭德久賢使君

風撼棠梨對殯宮中郎談笑孰形容不居上界神仙府  
當在補陀孤絕峯至論每符磁石鐵長生空問茯苓松  
九原可作還知否底處返魂香最濃

與富樞密

和氣從容一笑春如公今是暫閑身伊蒲饌設無多客  
蒼筤花繁正惱人已遣爐熏通鼻觀更分茗盃淪心塵  
僧房長夏宜幽僻杖屨頻來願問津

止戈堂



譙門直北望燕山乙巳年來例破殘可但中原仍禍結  
誰令東粵獨偷安西師有請君侯力南顧無憂聖慮寬  
惡少至今猶膽落雲臺須入畫圖看

八州賢牧喜休兵千騎重來竹馬迎萬瓦連薨存比屋  
十年回首賴長城舉觴談笑精明甚緩帶登臨步武輕  
多是門牆舊賓客願公黃髮佐昇平

次友人書懷

此生無意入修門痛飽鷄豚短褐溫卜築幾椽臨水屋

經營數畝傍山園酒杯賸喜故人飲書帙能遮老眼昏  
身世頗同猿擇木功名誰問鶴乘軒

腸斷春風楊柳花中原何日再京華將軍未報歌三箭  
樂府徒傳舞兩娃會見敵營如竹破不應淮甸又兵加  
頻年寒食常為客強索芳樽樂有涯

布穀催春惜雨乾白鷗江上未盟寒且傾客子醪釀酒  
共享先生首宿盤我已懸車羞輟輟公當鳴珮稱珊珊  
休文才思雖多病可是空吟紅藥闌

和楊聰父聞雨書懷

坎壈如公莫怨天  
謫居端是坐無氊  
時來要自有歸路  
客散不妨頻醉眠  
雲氣久能浮蜃屋  
雨聲殊未透龜田  
回思風雪圍爐夜  
何處聯裘擁木綿

筠谿居士跳出隨順境界  
把住放行自在神通  
縱橫妙用已是摸索不著  
妙現老子猶貶句中  
眼可謂善知識  
用心謹次嚴韻上呈

珍重筠谿舊主人  
我知明水是前身  
如何一念初無過

便有多生未了因止酒褰襦成厭雜逃禪槌拂要比隣  
雲居嫡子重拈出流布諸方此話新

次韻聰父見遺二首

十年遷客北歸時旁海相逢歎渺瀰枝上煙光忙蛺蝶  
尊中風味奪醪醕老來詩思真枯井別後心情似亂絲  
喜故將軍殊矍鑠家山小築未為遲

鷄嶼洋邊桃李穠岸沙遮海暮雲重乘槎我自犯牛斗  
掘獄誰何藏劔鋒世路肯遵前覆轍交遊誰識後彫松

此生但得長相見一笑能輕祿萬鍾

次聰父見遺韻

拙速還知勝巧遲男兒功業要逢時不妨唾面辱高馬  
似有泥坑規病鴟老去尚堪蘇子印興來須到習家池  
此心畢娶無餘事且向春江理釣絲

李丞相綱生朝三首

梁谿萬折必流東間氣英姿叶夢熊出入三朝推大老  
險夷一節合蒼穹守關虎豹徒窺闥得雨蛟龍定長雄

袞繡未歸聊袖手不妨閑作黑頭公

將壇丙午贊親征相印元年佐聖明賊子亂臣俱破膽  
皇天后土實同盟扶持更係民休戚進退元知勢重輕  
捨我其誰公健在乞身贏得見昇平

濟世功名肯力為風雲遇合貴逢時欲知辟穀師黃石  
便是扁舟號子皮後進忌能踰日月敵人用間果著龜  
福城東際笙歌地且祝千齡醉荔支

代上折樞彥質生朝二首

天扶王室挺生申瑞啓中興社稷臣樽俎折衝常自任  
廟堂康濟更何人秋風玉帳軍容肅冷月鈴齋夜宴新  
願掃妖氛開壽域袞衣端為轉洪鈞

秋水為神吉夢隨上公冠佩儼朝儀風雲感遇千齡會  
日月依光四海知筆陣詞鋒明藻色龍韜豹略繫安危  
頑金從此歸鑪錘歲歲門闌獻壽詩

福帥生朝二首

玉帳生朝香霧飛秋風欲到碧梧枝回思十載折衝地

還鎮八州安靜時  
淇澳會須歌綠竹  
渭濱猶待獵非羆  
止戈堂上多珠履  
爭獻龐眉春酒詩

金貂赫奕照來仍  
雅意諸郎以壽稱  
矍鑠儀形千歲鶴  
扶搖風力九霄鵬  
黃雲擺極人皆醉  
丹荔芳敷俎正登  
請看君侯高閣宴  
層梯無用一枝藤

葉少蘊生朝三首

絳節霓旌下九天  
括蒼初識地行仙  
桃華海上三千歲  
鳳歷人間五百年  
可但彤弓尋節制  
要知黔首望陶甄



香凝燕寢森蘭玉會見貂冠總附蟬

綠髮翱翔翰苑春昇平三輔已朱輪詩成山谷句中眼  
名應石林天上人耆舊政須廊廟具蕃宣聊寄股肱臣  
生朝賸欲為公壽醉裏蘋花度曲新

元戎玉帳凜霜威談笑何妨羽扇揮平日丹心馳象闕  
長年綵服奉慈闈誰無五馬人生貴獨有三奇命世稀  
志在麟經成事業頗聞天子詔公歸

題企疏堂

出處當師漢大夫立朝常擬賦歸歟賜金端為供行樂  
燕客猶疑是送車欲識吳門重解組要符潭府向移書  
聞知賸有閑風月宅相須留待小疏

左舉善人物高妙才具敏特要當為世用而乃  
攜孥撫孤以不二價從事丹壺中其曾次詎可  
窺耶一日出示諸公篇軸邀老夫同賦義不可  
辭

小隱丹壺時凭欄它年興在跨黃斑不妨遊戲橘中樂

政爾經營湖上山誰識曾懷容萬頃聊將身世寓三間  
故人有子猶流落我輩逢渠轉厚顏

病中示彭德器

老病無堪正坐貧交遊相見賴情親從渠造物小兒戲  
不礙維摩老子神三顧九遷成底事一區二頃合由人  
君侯論議高千古略假毫端問大鈞

挽李大然明

眼看流輩上青雲拂袖歸來晝掩門心計豈容生事拙

時名長與故山存不妨開徑栽花卉政復藏書遺子孫  
八十光陰無可恨聊歌楚些為招魂

再次前韻即事

太一遊行遍九宮世間無地可寬容坤維莫傍劒門閣  
衡嶽何依天柱峯睨柱儻能回趙璧思鱸安用過吳松  
羣羊競語遽如許欲息兵戈氣甚濃

再用韻奉留聰父

長飢方朔笑侏儒歲晚還驚大小餘客裏論文聊把酒

閑來會面勝通書  
薄寒欺醉悲清夜  
孤月流光悵碧虛  
何苦相逢又相別  
不如供米寓僧居

辛酉別楊聰父

春風著意送將歸  
為賦清江落日低  
惜別更留烹玉鱸  
寓居長記對青猊  
家山彼此歸心速  
岐路東西客夢迷  
重把一樽成悵望  
鶯啼綠暗草淒淒

次韻陳德用明府贈別之什

人欺季子弊貂裘  
誰信班生萬里侯  
小隱故山今去好

中原遺恨幾時休  
春爭殘臘寒梅早  
雨澀晴冬宿麥憂  
老眼相看炯無語  
濁醪何日更澆愁

希道使君弭節合沙館  
奉太夫人遊鼓山迺蒙  
封示所和夢錫贈行佳句  
輒次嚴韻少叙別懷  
淮海元龍公輩流  
何勞老手鎮方州  
雍容行色自登覽  
邂逅故人仍倡酬  
眼界蚤驚雲子熟  
官期能為荔枝留  
臨分莫話中原事  
想見家山只夢遊

希道使君入山再有佳句見及復次元韻因簡

老禪

古澗寒泉可枕流從渠庚伏在炎州杖藜端欲事幽討  
杯酒未容相勸酬坐上縱無居士客山間聊為老禪留  
臨滄亭外忘歸路他日逢君望舊游

欽定四庫全書

蘆川歸來集卷四

宋 張元幹 撰

五言絕句

龍眠墨梅

江南一枝春歲久暗香減  
怪得深夜寒荒村映殘雪

歲寒三友圖

蒼官森古鬣此君挺剛節  
中有調鼎姿獨立傲霜雪

墨菊



老眼驚花暗斜枝落紙愁晚來聞冷雨幻出一籬秋

六言絕句

次韻王性之題篠叢枯木

犖确有岱華勢輪囷無斤斧痕我來翻君古錦老眼洗  
盡眊昏

七言絕句

上平江陳侍郎十絕

并序

先生儒門老尊宿也立朝行己三十年間堅

忍對峙略不退轉直與古人爭衡自有清議  
不復贊歎頃在宣和庚子年獲拜先生於南  
康留山中者久之蒙跋大父手澤某佩服訓  
誨自知無用辛亥休官忽忽二十九載行年  
七十矣日暮塗遠恐懼失墜輒追記平昔所  
得先生話言裁為十絕句書以獻於蘇州使  
君待制公克肖以是謹守一家法庶幾流傳  
不泯俾天下後世尊其所聞常仰之如泰山

北斗則小子與有榮焉

了堂先生古遺直貶剝私史專尊堯二蔡懷姦首

首一作力

排擊始終大節不同朝

灼見禍機寧有死剖心立敵肯忘言向來逆料無遺恨  
徹底孤忠抱至冤

前賢一節皆名世此道終身公獨行每見遺編須掩泣  
晚生期不負先生

南荒百謫愈不屈便道忽聞天遣來我帽焚香姑拱立

果無片楮可成災

此事實親得於先生其說如此

酒酣怒髮上衝冠  
四十年前廬阜南  
杖履周旋痛開警  
為言小子頗嘗參

英靈精爽平生話  
尚記先生首宿槃  
僊去星辰終不滅  
至今夢想骨毛寒

功名啐啄與時同  
譬似青天白日中  
不覺片雲隨雨電  
適從何處運神通

先生嘗云丈夫建立功名要當坐進此道

常佩了堂一則語  
睢陽舉似劉潞州  
大期不復見丙午

二老信然成古丘

先生嘗委達意於器之待制劉公云

先生許可能尊祖詞采今存幹蠱身碑版燦然垂世譽  
要知忠肅有門人

傷心頃拜公牀下一氣飄零餘幾人七十衰翁誰信及  
話言端欲廣書紳

甲戌正月十四日書所見來日驚蟄節

老去何堪節物催放燈中夜忽奔雷一聲大震龍蛇起  
蚯蚓蝦蟆也出來

走筆次廷藻韻二絕

風雨聲中過半春  
泥深郊水阻遊人  
老夫不出渾閒事  
但覺年來白髮新

小蘓一物絕風流  
竹杖芒屨愛討幽  
招隱歸來吐佳句  
何時一笑共重遊

高尚居士

卜室高垣桑柘邊  
空中來往盡飛仙  
似聞一舉三千里  
更待成功上九天

往在澶淵過我家自憐凡骨走天涯丹青始識先生面  
點化何時一粒砂

祖頴漕使希道使君以絕句相酬答聊成二章  
解嘲併發一笑

從渠冷蘂籬邊少未放浮蛆甕面空高燭幾時催夜飲  
隔簾度曲也英雄

薰爐玉煖雲生岫曉鑑鸞窺翠掃空未許尊前聽金縷  
兩公新句漫爭雄

次韻奉送李季言四首

向來敵帥窺吳越，穩泛樓船捨騎兵。  
開闢所無顛倒事，可能今日獨橫行。

藩鎮各傳新號令，山河那復舊提封。  
歸時賸語騎鯨老，堅卧無如澗底松。

幾年脫迹冠冕窟，一味偷生兵火中。  
不見君家好兄弟，何人憐我最奇窮。

我輩避讒過避賊，此行能飽即須歸。  
山川久有真消息，



世上從渠閑是非

范才元道中雜興

遐想吳門人姓梅  
高蹤千古共徘徊  
橋中儻有商山樂  
不必胡僧問劫灰

山晚江寒春雨踈  
比來消息定何如  
竹輿行勸異鄉縣  
賴得金樓引睡書

底處煙林飛伯勞  
春生詩思騰搖毫  
歸來準擬扶頭醉  
日射花梢三丈高

君家鼻祖大范老氣壓賀蘭威鳳鳴文采風流今未泯  
耳孫曾次似冰清

名姓未能隨老變政須卜宅近前峯看君決策上封事  
攬取奇勲銘鼎鐘

圓通秀禪師送遜公首座赴明水請

元豐二年  
也遜乃閩

清黃  
氏子

卷衲和雲離五老派分三峽濟臨川興波作浪從風鼓  
莫學世流空度緣

伽陀二首送了可首座歸四明

淨因曾識楷山東擔板因緣古佛風後代兒孫仰孤硬  
能超五位見芙蓉

問訊天童今老子偶同庚甲事如何他時要向山中去  
容我一菴遮薜蘿

病起枕上口占三絕句奉呈公實嶠之賢伯仲  
一笑

天上寶囊無盡藏向來密賜被先王自憐門下老賓客

燕寢飽曾聞妙香

素馨茉莉及玫瑰清馥渾同雪裏梅六入不分初病起  
眼前欠此共裴回

海外綠洋來萬里齊驅黎母鷓鴣斑肯分種種篋中富  
不用公家金博山

題忠上人墨梅

寒梢的皪點昏鴉雪後風前皎月華結習未除羞老眼  
更看淡墨幻空花

岷山萬松圖

疊嶂連娟入翠微  
喬松蔽日有孫枝  
江流不盡松聲遠  
雲棧行人力困時

江梅

密雪飛花萬木僵  
南枝的皪待朝陽  
還知百果輸先手  
政為孤根壓衆芳

菊

秋風著意菊叢黃  
不怕東籬五夜霜  
曾記南陽飲潭水

要令道骨合仙方

桂井

移根一戶蟾光溢分派銀河地脈靈定與蘇僊雙橋井  
他年續入酈元經

餘艘齋

人間日日有風波不繫虛舟奈若何袖取平生濟川手  
行藏終與爾同科

麥秋亭

東坡喜雨事如此吾舅名亭思不羣不問兩岐何許秀  
且看十頃卷黃雲

題獨愛軒

此君風味極不淺戶外俗人來未曾老石寒藤同一笑  
我知公是在家僧

寄題悠然閣三絕句

林端結閣小躋攀四面嵐光繞曲欄佛法本來南北異

箇中北望見南山

此閣面北却  
有南山景

登臨巧處屬僧家  
隨分生涯度歲華  
莫待藤蘿滿山月  
時來倚杖數昏鴉

誰標此閣作悠然  
萬事無非信手拈  
參得東籬把菊意  
不妨老遠引陶潛

跋趙唐卿所藏訪戴圖

萬壑千巖一剡溪  
漫天雲凍雪風飛  
人蹤鳥跡俱沉絕  
獨有扁舟興盡歸

王孫胷次足丘壑  
幻出山陰訪戴圖  
草屋柴扉閉風雨



客來空去得知無

跋東坡木石

玉局老仙天下人平生愛與石傳神  
長江絕島風濤裏千古常令墨色新

題六代祖師畫像

一葦浮江雙履歸花開震旦共傳衣  
本來心印無文字畫到盧能足是非

呂公像

巾裏唐裝本布衣平生唯識一鍾離此中養得嬰兒就  
世上行尸有許悲

秋空一劒岳陽樓醉裏乾坤日夜浮五百年間興廢事  
不知誰是赤松游

瀟湘圖

落日孤烟過洞庭黃陵祠畔白蘋汀欲知萬里蒼梧眼

淚盡君山一點青

按此詩據艇  
齋詩話增

